

Hesus, e Saserdote Fiel

Les 6 di kuartaal 1, aña 2022

Les a pa e siman aki:

Heb. 5:1-10; Gen.14:18-20; 1 Ped. 2:9; Heb. 7:1-3; Heb. 7:11-16, 22, 26.

TEKSTO PRINSIPAL:

"Pasobra tabata kumbiní pa nos tin un sumosaserdote asina, santu, inosente, sin mancha, separá for di pekadónan i halsá riba e shelunan" (Hebreo 7:26, Beibel Santu).

Hesus, e Saserdote Fiel

sabbat, 29-01-2022

E abismo ku tabata eksistí entre Dios i nos a wòrdu kousá pa piká. E problema a bira mas grave pasombra piká tabata impliká tambe korupshon di nos naturalesa. Dios ta santu i piká no por eksistí den Su presensia; pues, nos propio naturalesa korumpí a separá nos for di Dios, meskos ku dos magnet den e orientashon robes ta rechasá otro. Adishonalmente, nos naturalesa korumpí a hasi posibel pa sernan humano obedesé Dios Su lei. Piká tambe ta enserá mal komprondementu. Sernan humano a pèrde e amor i misèrikòrdia di Dios for di bista i a bin mir'E komo un Dios yen di rabia i ku gusta manda.

E siman akí, nos ta bai studia e kosnan asombroso ku e Tata i Hesus a hasi pa forma un brug riba e abismo ei. Hebreo 5-7 ta proveé un análisis kuidadoso di Hesus Su saserdosio. E outor ta analisá su orígen i propósito (Heb. 5:1-10) i despuesta eksortá lesadónan pa no keda sin hasié kaso (Heb. 5:11-6:8) pero na lugá esei tene duru na e siguransa di speransa ku e ta proveé (Heb. 6:9-20). Tambe e ta splika e karakterístikanan di Su saserdosio (Heb 7:1-10) i su implik ashonnan pa Dios Su relashon pa ku kreyentenan (Heb. 7:11-28). E siman akí nos lo enfoká spesífikamente riba Hebreo 5:1-10 i Hebreo 7:1-28.

Studia e lès di e siman alá pa prepará pa Sabat, 5 di febrüari.

Un Saserdote na Fabor di Sernan Humano

djadumingu, 30-01-2022

Les a Hebreo 5:1-10. Kiko ta e ròl di e saserdosio i di akuerdo ku e porshón akí, kon Hesus ta kumpli ku e ròl ei?

E propósito básiko di un saserdote ta pa media entre hende pekaminoso i Dios. Saserdotenan tabata wòrdu skohí pa Dios pa nan por ministrá na fabor di Sernan humano; p'esei, nan mester tabata misèrikòrdioso i komprehensivo pa loke ta trata debilidatnan humano.

Den Hebreo 5:5-10, Pablo ta mustra ku Hesus ta kumpli ku e propósitonan ei perfektamente: Dios a skoh'E (Heb. 5:5, 6) i tambe Hesus ta komprondé nos pasobra E tambe a sufri (Heb. 5:7, 8).

Sinembargo, tin algun diferensianan importante. Hesus no a wòrdu "skohí for di den hende"(Heb. 5:1, Beibel Santu). Na lugá di esei, Hesus a adoptá naturalesa humano pa e por, entre otro, sirbi komo un saserdote na nos fabor. Hesus no a ofresé sakrifisio pa Su propio pikánan (Heb. 5:3) pero solamente pa nos pikánan, pasobra E tabata sin piká (Heb. 4:15, Heb. 7:26-28).

Hebreo ta bisa ku Hesus tabata ofresé orashon "na Esun ku ta kapas pa salb'E for di morto, i El a wòrdu tendí" (Heb. 5:7, Beibel Santu). Hebreo tabata referiendo na e segundo morto, for di kua Dios a salba Hesus ora ku El a resusit'E (Heb. 13:20). Hebreo ta bisa tambe, ku Hesus "a siña obediensia dor di e kosnan ku El a sufri" (Heb. 5:8, Beibel Santu). Obediensia tabata nobo pa Hesus, no pasobra E tabata desobediente, pero pasobra E tabata Dios. Komo soberano riba e universo, Hesus no a obedesé niun hende; na lugá di esei, tur hende a obedesé E.

Hesus Su sufrimentunan i morto na e krus ta un parti esensial di Su ministerio di saserdote. Sufrimentu no a hasi Hesus perfekto den sentido di ku El a mehorá moralmente òf étikamente. Sufrimentu no a hasiE misèrikòrdioso. Kontrali na esaki, Hesus a bini na e mundu aki pasobra semper E tabata misèrikòrdioso, kual ta e motibu pa kiko E tabatin kompashon pa ku nos (Heb. 2:17). Loke Hebreo ke men ta ku tabata pa medio di sufrimentu e realidat di Hesus Su amor di ruman, e outentisidat di Su naturalesa humano, i e profundidat di Su sumishon komo representante di humanidat na e boluntat di e Tata a wòrdu ekspresá i revelá berdaderamente. El a wòrdu "hasí perfekto" den sentido di ku Su sufrimentunan a kualifik'E pa ta nos Sumosaserdote. Ta Su bida di obediensia perfekto, i despues Su morto na e krus a konstituí un ofrenda di sakrifisio ku Hesus a presentá dilanti di e Tata komo nos saserdote.

Promé Pedro 2:9 ta bisa ku nos ta "un saserdosio real."Kiko Hesus Su bida ta bisa bo ku bo relashon ku otro sernan humano mester ta pa motibu ku nos ta den e ròl sagrado akí?

Segun e Órdu di Melkisedek

djaluna, 31-01-2022

Les Genesis 14:18-20 i Hebreo 7:1-3. Ken tabata Melkisedek, i kon el a prefigurá Hesus?

Melkisedek tabata tantu un rei komo un saserdote. Tambe e tabata superior na Abraham, unabes ku Abraham tabata paga diesmo na dje. Di mes manera, Hesus ta rei i saserdote (Heb. 1:3); sinembargo, diferente for di Melkisedek, Hesus tabata sin piká (Heb. 7:26-28). Hebreo 7:15 ta splika ku Hesus tabata saserdote "segun e semehansa di Melkisedek" (Beibel Santu). Esaki ta loke e ekspreshon promé den Hebreo, "segun e órdu di Melkisedek" (Heb. 5:6, Beibel Santu), ta nifiká. Hesus no tabata un sucesor di Melkisedek, pero Su saserdosio tabata similar na di dje.

Por ehèmpel, Pablo ta bisa ku Melkisedek tabata sin tata, mama, ginealogia, nasementu, i morto. Algun ta splika ku Melkisedek tabata un enkarnashon di Hesus den tempu di Abraham. Pero e pensamentu akí no ta kuadra ku e argumento di Hebreo. Melkisedek ta "parse" Hesus, kual ta impliká ku E tabata diferente for di Hesus (Heb. 7:3).

Tin otro hende ta splika tambe ku Melkisedek tabata un ser selestial, pero esaki lo destruí e argumento di Hebreo. Si Melkisedek lo tabata sin tata, mama, komienso óf fin, lo e mester tabata Dios mes. Esaki tin un problema. Melkisedek su saserdosio selestial, kompletamente divino lo tabata promé ku e ministerio di Hesus. Si esaki tabata e kaso, manera Hebreo ta bisa, "ki nesesidat mas tabatin pa un otro saserdote lanta" (Heb. 7:11, Beibel Santu)?

Na lugá di esei, Hebreo ta usa e silencio di Skritura pa loke ta trata e nasementu, morto i ginealogia di Melkisedek pa traha un tripologia, simbolo pa Hesus Su ministerio saserdosial (Gén. 14:18-20) i pa e echo ku Hesus mes tabata eterno. Pues, Melkisedek tabata un rei saserdote kananeo ku a sirbi manera un tipo di Kristu.

"Ta Kristu tabata Esun ku tabata papia atraves di Melkisedek, e saserdote di e Dios altísimo. Melkisedek no tabata Kristu, pero e tabata e bos di Dios den e mundu, e representante di e Tata. I den tur e generashonnan di pasado, Kristu a papia; Kristu a guia Su pueblo, i tabata e lus di e mundu."- Ellen G. White, Selected Messages, buki 1, p. 409.

Kiko e Revelasbon tokante di Melkisedek ta siña nos tokante di kon Dios ta traha entre esnan ku nunca tabatin mishoneronan humano pa prediká na nan?

Un Saserdote Efektivo

djamins, 01-02-2022

"Awor, si perfekshon tabata bin dor di e saserdosio levítico (pasobra a base di esaki e pueblo a risibí e Lei), ki nesesidat mas tabatin pa un otro saserdote lanta segun e órdu di Melkisedek, i no yamá segun e órdu di Aaron?"(Heb. 7: 11, Beibel Santu).

Saserdotenan ta mediadornan entre Dios i sernan humano. Sinembargo, Hebreo ta bisa ku saserdotenan Levítico no tabata por a proveé aksesu kompletu i konfiabel na Dios pasobra nan no tabata por a proveé perfekshon (Heb. 7 :11, 18, 19). Finalmente, nan mes no tabata perfekto; pues, kon nan lo tabata por a pone perfekshon riba otronan di un manera òf otro?

Tampoko e sakrifisionan di animal por a limpia e konsenshi di e pekador. Nan propósito tabata pa muestra na e ministerio di Hesus i Su sakrifisio, kual solamente lo proveé berdadero limpieza for di piká (Heb. 9:14; Heb. 10:1-3, 10-14). E funshon di e saserdotenan Levítico i nan sakrifisionan tabata temporal i ilustrativo. Pa medio di nan ministerio, Dios tabata ke guia e pueblo pa pone nan fe den e futuro ministerio di Hesus, " 'e Lamchi di Dios ku ta kita piká di mundu!" " (Huan 1:29, Beibel Santu).

Lesu Hebreo 7:11-16. Di kon tabatin un nesesidat pa kambia e lei?

Hebreo 7:12 ta splika ku e kambio di saserdosio a hasi un kambio den e lei algu nesesario. Di kon? Pasobra tabatin un lei hopi estrikto ku tabata prohibí un persona ku no tabata for di e liña di Levi dor di Aaron di sirbi komo un saserdote (Num. 3:10 ; Num. 16:39, 40). Hebreo 7:13, 14 ta splika ku Hesus tabata for di e liña di Huda, i pues e lei akí tabata prohibí'E di ta un saserdote. Pues, Pablo ta bisa ku e skohementu di Hesus' komo saserdote ta nifiká ku Dios a kambia e lei di saserdosio.

Hesus Su binida tambe tabata impliká un kambio den e lei di sakrifisionan. Pekadornan tabata wòrdu rekerí pa trese diferente tipo di sakrifisionan pa haña ekspiasion (Levítico 1-7), pero awor ku Hesus a bini i a ofresé un sakrifisio perfekto, e lei di sakrifisio di animalnan tambe a wòrdu poní un banda (Heb. 10:17,18) komo resultado di un aliansa nobo i e revelashon mas kompletu di e plan di salbashon.

Pensa tokante di e kantidat enorme di sakrifisionan di animal ofresé den antiguedat, tur mustrandu na Hesus, i tòg ni un di nan-òf nan tur-lo no por realmente paga pa nos pikánan. Di kon ta solamente e morto di Hesus por paga pa nan?

Un Saserdote Eterno?

djarason, 02-02-2022

Les a Hebreo 7:16. Riba kua base Hesus a bira saserdote?

Hesus a risibí e saserdosio riba e base di un bida indestruktibel i pasobraE tin un ministerio eterno. E implikashonnan di e echonan akí ta asombroso. E ta nifiká ku Hesus Su ministerio nunca lo wòrdu superá. Hesus ta salba kompletamente, eternamente, "pa semper"(Heb. 7:25). E salbashon ku Hesus ta proveé ta total i final. E ta yega na e partinan di mas paden di naturalesa humano (Heb. 4:12, Heb. 9:14, Heb. 10:1-4). Hesus Su interseshon dilanti di Dios ta enbolbí tur e benefisionan duná bou di e aliansa nobo.

E ta inkluí muchu mas ku pordon di pikánan tambe. E ta impliká ponementu di e leí den nos kurason, hasiendo nos hende nobo den djE, i kondusiendo na e plamamentu di e evangelio na emundu (Heb. 8:10-12). Manera Unu ku Dios i ku sernan humano, E ta representá nos dilanti di e Tata. Manera Unu ku a ofresé Su bida komo un sakrifisio, Hesus tin fabor no hesitante dilanti di Dios.

Les a Hebreo 7:22. Kiko Hesus ta den relashon ku e aliansa nobo?

Hesus ta e siguransa di e aliansa nobo pasobra Dios a hasi un huramentu ku Hesus lo ta un saserdote "pa semper" (Heb. 7:21). Ta hopi fásil pa keda sin komprondé e importansia di e huramentu akí. Pablo ya a yega di referí na e huramentunan ku Dios a hasi na e generashon di desierto i na Abraham (Heb. 3:7-11, Heb. 6:13-15). E diferensia entre e huramentunan ei i e huramentu ku Dios a hasi na e Yu ta ku e huramentunan ei a wòrdu hasi na sernan humano mortal. Huramentunan ta keda na vigor mientras tantu e benefisiarionan ta na bida. Dios Su huramentu na e generashon di desierto i na Abraham tabata na vigor mientras tantu tabatin un generashon di desierto i desendientenan di Abraham (wak Gal. 3:29).

Sinembargo, den e kaso di e Yu, Kende Su bida ta "indestruktibel," e huramentu ku Dios a hasi na djE lo ta na vigor pa semper. Un persona ku a para bòrg òf garantía pa un otro tabata responsabel na e mesun kastigunan ku e persona for di kua el a para bòrg, inkluyendo morto. Tòg, e Tata a stablesé Hesus komo un garantía pa nos pa asina E no keda sin kumpli ku Su promesanan. Asina sigur nos por ta di e salbashon ku nos a haña den Hesus.

Un Saserdote Sin Piká

djaweps, 03-02-2022

Lesu Hebreo 7:26. Kua ta e sinku karakterístikanan di Hesus den e porshón akí?

Hesus tabata "santu." Esaki ta nifiká ku Hesus tabata sin fayó den relashon na Dios (Heb 2:18; Heb . 4: 15; Heb. 5:7,8). E tradukshon griego bieu di e Tèstament Bieu a usa e mesun término griego pa designá esnan ku ta mantené nan relashon di aliansa ku Dios i ku otronan.

Hesus tabata "sin mancha." El a permanesé puru i maldat no a mishi kunE, apesar di "a wòrdu tentá den "tur kos" (Heb. 4:15, Heb. 2:18). E echo ku Hesus ta sin piká i perfekto ta importante pa Su saserdosio. E aliansa bieu tabata stipulá ku víktimanan di sakrifisio mester tabata "sin defekto" pa ta aseptabel pa Dios (Lev. 1:3, 10, ets.). Hesus Su obedensia perfekto durante di Su bida riba tera a hasi posibel pa E ofresé Su mes komo un sakrifisio aseptabel na Dios (Heb. 9:14). Hesus a wòrdu "separá for di pekadornan" ora ku El a subí bai na shelu.

E tempu di e verbo griego ta bisa ku esaki ta un estado presente pa Hesus, ku a kuminsá na un punto spesífiko den tempu. Hesus a soportá hostilidad for di pekadornan durante di Su bida riba tera, pero E tabata viktorioso i a sinta na man drechi di Dios (Heb. 12:2,3). Hesus ta "separá for di pekadornan" tambe pasobra E tabata perfektamente sin piká (Heb. 4:15).

Hesus a wòrdu " eksaltá...riba e shelunan". E ta nifiká ku Hesus a wòrdu eksaltá riba tur kos ku tin i p' esei, E ta unu ku Dios. Den Salmo, Dios ta esun ku ta "eksaltá riba e shelunan" (Sal. 57:5, 11; Sal. 108:5).

Hesus tabata kompletamente humano, pero e no tabata un ser humano pekaminoso manera nos (Heb. 2:14-16, Heb. 4:15). Hesus tabata perfekto, no simplemente pasobra nunca El a peka pero pasobra E no a wòrdu korumpí pa piká manera nos.

Tòg, pasobra E tabata kompletamente humano tambe, E ta nos ehèmpel tambe. E ta mustra nos kon pa kore e kareda di bida (Heb. 12:1-4). E ta e ehèmpel ku nos mester sigui (1 Ped. 2:21-23). Pasobra E ta "santu, inosente, sin mancha, separá for di pekadónan" (Heb. 7:26, Beibel Santu), E ta nos Salbador, i nos tambe por reflehá Su karakter.

Aunke ku Hesus tabata un ser humano, manera nos, nunca El a peka. Kon nos por logra komprondé e pensamentu asombroso akí? Pensa riba simplemente kon santu lo E ta! Di kon, anto, e promesa di Su santidat akreditá na nos pa medio di fe ta yuda duna nos siguransa di salbashon?

Mas Estudio:

djabinne, 04-02-2022

"Kristu ta mirando. E sa tur kos tokante di nos karganan, nos peligernan, i nos difikultatnan; i E ta yena Su boka ku argumentunan na nos fabor. E ta ahustá Su interseshonnan na e nesesidatnan di kada alma, manera El a hasi den kaso di Pedro....Nos Abogado ta yena Su boka ku argumentunan pa siña esnan ku ta di djE i ku ta wòrdu di tèst i tentá pa prepará kontra e tentashonnan di Satanas. E ta interpretá kada moveshon di e enemigu. E ta goberná eventonan."Ellen G. White, SDA Bible Commentary, vol. 7, p. 931 (Karta 90, 1906).

"Tabata Satanas su propósito pa trese un separashon eterno entre Dios i hende; pero den Kristu nos ta bira mas serka uní ku Dios kompará ku loke nos lo tabata si nunca nos lo a kai. Ora El a tuma nos naturalesa, e Salvador a mara Su mes na humanidat ku un kabuya ku nunca lo kibra Esaki ta e huramentu ku Dios lo kumpli ku Su palabra. 'Pasobra un yu a nase pa nos, un yu hòmber ta duná na nos, i e gobernashon lo ta riba Su skouder.' Dios a adoptá naturalesa humano den e persona di Su Yu, i a karga e mesun naturalesa kí den e parti di mas haltu den shelu. Ta e 'Yu di hende' ta esun ku ta kompartí e trono di e universo. Ta e 'Yu di hende' ta esun ku Su nòmber lo wòrdu yamá, 'Konsehero Maraviyoso, Dios Poderoso, Tata Eterno, Prens di Pas.' Isaías 9:6. E AMI TA ta e konekshon entre Dios i humanidat, poniendo Su man riba tur dos. E ku ta 'santu, inosente, sin mancha, separá for di pekadónan,' no tin bergwensa di yama nos rumannan. Hebreo 7:26; 2:11. Den Kristu e famia di tera i e famia di shelu ta mará huntu. Kristu glorifiká ta nos ruman. Shelu ta konsagrá den humanidat, i humanidat ta lorá den e pechu di Amor Infiníto."-Ellen G. White, The Desire of Ages, pp. 25, 26.

Preguntanan pa Diskushon:

1. E promé sita ariba ta bisa, "E [Hesus] ta yena Su boka ku argumentonan na nos fabor."

Kiko e promesa ei ta nifiká pa bo? Pensa riba kiko esaki ta siña nos tokante di Dios Su amor pa nos. di kon e idea aki ta duna nos kurashi? Di kon nos lo tin mester di un hende pa argumentá na nos fabor?

2. E segundo sita ariba ta bisa, "den Kristu nos ta bira mas serka uní ku Dios kompará ku loke nos lo tabata si nunca nos lo a kai." Kiko esei ta nifiká? Kon nos por eksperensia e unidat ei, i ki konsuelo lo bo por saka for di e eksperensia ei? Den klas, deskribí kiko e unidat aki ta nifiká i kon ta sinti pa eksperensia esaki. Kon Su "argumentonan na nos fabor" ta yuda nos tin e eksperensia aki?